

Bil. 4

Rabu

20 Mac 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT PERTAMA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Pakej Rancangan Khas Sekolah Tamil 2012**
- *YB. Dato' Seri Dr. Santhara (Segamat)*

[Halaman 1]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Rabu, 20 Mac 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Pakej Rancangan Khas Sekolah Tamil 2012

2.34 ptg.

Dato' Seri Dr. Santhara [Segamat]: Terima kasih Tuan Yang di-Pertua. Tajuk ucapan 'Pakej Rancangan Khas Sekolah Tamil 2012'. Tuan Yang di-Pertua, pertama sekali saya ingin mengucapkan setinggi-tinggi penghargaan kepada pihak Kementerian Pendidikan Malaysia yang sentiasa berusaha untuk membuat yang terbaik untuk memajukan sistem pendidikan negara demi kepentingan rakyat Malaysia dan menyumbang kepada pembangunan Malaysia.

Namun begitu, izinkan saya membawa kepada perhatian Tuan Yang di-Pertua mengenai masalah-masalah yang masih membelenggu sekolah-sekolah Tamil di negara ini. Walaupun sudah lama diketengahkan, khususnya oleh masyarakat India dan pemimpin-pemimpin, tetapi tiada penyelesaian efektif sehingga kini. Lebih menyedihkan, isu-isu ini sering kali dijadikan mainan politik oleh sesetengah pihak dengan motif untuk merosakkan nama kerajaan dan juga menimbulkan keraguan di kalangan rakyat terhadap usaha kerajaan.

Merujuk kepada Pakej Rancangan Khas 2012 (Sekolah Tamil), daripada peruntukan sebanyak 37 sekolah baharu sejak tahun 2014, hanya 25 sekolah telah berjaya disiapkan sehingga kini. Terdapat laporan yang menunjukkan kontraktor yang dianugerahkan projek tersebut mengalami masalah kewangan yang agak serius. Saya ingin meminta pihak kementerian menjelaskan dengan terperinci punca kelewatan dalam masalah menyiapkan sekolah-sekolah yang diperuntukkan dan jika laporan mengenai masalah kewangan yang

dihadapi oleh kontraktor tersebut adalah benar, diharap pihak kementerian dapat juga memberikan maklumat mengenai status tiga sekolah Tamil di bawah *rolling plan* yang masih belum disiapkan. Terdapat 13 sekolah di bawah pengawasan Jabatan Perdana Menteri atau PTST yang masih dalam proses pembinaan, tujuh sekolah di bawah projek Sekolah Tamil Baharu, dua sekolah di bawah projek *development expenditure* dan termasuk sekolah Tamil di bawah Pakej Rancangan Khas 2013 Fasa 1, Fasa 2 dan Fasa 3.

Saya juga ingin memohon supaya pihak kementerian menjelaskan mengenai status *certificate of completion and compliance* (CCC) untuk 31 prasekolah Tamil yang telah diperuntukkan bersama-sama dengan status identifikasi, permohonan, gazet tanah dan jumlah peruntukan untuk memindahkan lokasi sekolah-sekolah terlibat. Sekian, terima kasih.

2.36 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua. Terima kasih Ahli Yang Berhormat Segamat. Tuan Yang di-Pertua, Kementerian Pendidikan Malaysia mengucapkan terima kasih kepada Ahli Yang Berhormat Segamat terhadap keprihatinan beliau berkaitan Pakej Rancangan Khas (Sekolah Tamil) 2012. Kementerian Pendidikan Malaysia bertanggungjawab untuk menjelaskan tentang isu ini bagi mengelakkan perkara tersebut disalahtafsirkan dan seolah-olah kementerian mengabaikan isu pembangunan sekolah jenis kebangsaan Tamil.

Tuan Yang di-Pertua, status bagi 37 projek sekolah baharu di bawah Pakej Rancangan Khas 2012-2014, sebanyak 17 projek telah berjaya siap sepenuhnya. Manakala 14 projek telah melebihi 95 peratus dalam proses pematuhan *certificate of completion and compliance* (CCC) dengan izin, dokumen kontrak. Baki enam projek masih di peringkat pelaksanaan. Sehubungan dengan itu, status projek di bawah Pakej Rancangan Khas 2017 yang dinyatakan oleh Ahli Yang Berhormat Segamat adalah termasuk dalam 37 projek di bawah Pakej Rancangan Khas 2012-2014.

Isu utama yang dihadapi oleh pihak kontraktor adalah untuk memenuhi syarat-syarat pihak berkuasa tempatan bagi mendapat kelulusan kebenaran merancang (KM). Syarat-syarat tersebut adalah tertakluk dalam syarat-syarat kontrak secara reka dan bina (*design and build*) dengan izin, iaitu CCC diperlukan sebelum pengeluaran *certificate of practical completion* (CPC), dengan izin. Hal yang demikian menyebabkan pihak kontraktor mengalami kelewatan dalam menyiapkan projek mengikut tempoh siap yang telah ditetapkan.

Kelewatan juga berlaku kerana terdapat kontraktor yang dilantik mengalami masalah pusingan modal untuk menyiapkan projek. Sehubungan itu, sebagai langkah untuk mengatasi

masalah ini, kementerian telah mengangkat permohonan pengecualian *liquidated and ascertained damages* (LAD) dengan izin, kepada Kementerian Kewangan bagi menyiapkan kerja-kerja berbaki sehingga memperoleh CCC pada 1 Mac 2019.

Tuan Yang di- Pertua, berhubung dengan status tiga projek SJK(T) di bawah *rolling plan* iaitu SJK(T) Ladang Jasin Lalang, Melaka; SJK(T) Ladang Kemuning Kru, Melaka; dan SJK(T) Ladang Dovenby, Perak. Projek-projek ini telah diputuskan oleh kementerian untuk diserahkan kepada Jabatan Kerja Raya. Dimaklumkan juga bahawa SJK(T) Ladang Kemuning Kru, Melaka dan SJK(T) Ladang Dovenby, Perak juga berada di bawah *development expenditure*, dengan izin.

Untuk makluman Ahli Yang Berhormat Segamat, berdasarkan maklumat yang diterima daripada pihak Unit Transformasi Masyarakat India Malaysia (MITRA) Jabatan Perdana Menteri pada 14 Mac 2019, terdapat 13 projek SJK(T) di bawah pengawasan unit tersebut.

■1440

Lapan projek telah siap dibina, manakala lima buah sekolah masih dalam proses pembinaan. Berkaitan dengan kelewatan projek pembinaan sekolah-sekolah ini, boleh dikatakan bahawa faktor kelewatannya adalah di luar kawalan KPM kerana pengurusan projek sekolah berkaitan adalah di bawah kelolaan Lembaga Pengelola Sekolah.

Tuan Yang di- Pertua, bagi projek 10 sekolah Tamil baharu, sebuah sekolah telah beroperasi pada 15 Mac 2018 yang lalu iaitu SJK(T) Taman Sentosa, Klang Selangor. Manakala status sembilan projek lain adalah seperti berikut:

- (i) empat buah sekolah - kemajuan fizikal projek adalah melebihi 90 peratus dan dijangka mula beroperasi pada pertengahan tahun 2019 iaitu SJK(T) Taman Keladi, SJK(T) Taman Kaya, SJK(T) Bandar Mahkota dan SJK(T) Bandar Sri Alam;
- (ii) tiga sekolah - kemajuan fizikal projek antara 41 peratus hingga 45 peratus iaitu SJK(T) Jalan Tajul, SJK(T) Gunung Rapat serta SJK(T) Heawood dan dijangka mula beroperasi penghujung tahun 2019;
- (iii) satu projek iaitu SJK(T) Kuala Pilah, Negeri Sembilan sedang dalam proses penilaian semula KPM memandangkan terdapat pertambahan kos projek dan akan dilaksanakan segera selepas isu kewangan projek diselesaikan. Buat masa ini, pihak KPM masih mengenal pasti sumber peruntukan bagi pertambahan kos projek tersebut; dan
- (iv) satu projek iaitu SJK(T) PJS 1, Petaling Jaya, Selangor. Kontraktor bagi melaksanakan projek ini telah dilantik pada Mac 2018. Walau

bagaimanapun kerja-kerja di tapak tidak dapat dilaksanakan kerana terdapat isu pencerobohan. Pihak KPM telah memohon kerjasama pihak berkuasa tempatan dan pihak berkaitan bagi melaksanakan tindakan penguatkuasaan. Projek dijangka dapat diteruskan setelah isu pencerobohan ini selesai iaitu pada April 2019.

Tuan Yang di-Pertua, kementerian tidak pernah mengabaikan tanggungjawab terhadap pendidikan prasekolah termasuklah di SJK(T). Untuk makluman, status terkini pembinaan kelas 33 prasekolah SJK(T) adalah seperti berikut. Sebanyak 31 kelas prasekolah telah siap dibina sepenuhnya. Walau bagaimanapun, semua kelas prasekolah ini masih belum menerima kelulusan CCC kerana bangunan sedia ada tidak mendapat kelulusan kebenaran merancang (KM) dan isu status tanah yang masih belum selesai. KPM sedang berusaha untuk menyelesaikan isu ini dalam masa terdekat agar semua kelas prasekolah ini dapat beroperasi secepat mungkin. Dua lagi projek kelas prasekolah masih belum dibina iaitu:

- (i) SJK(T) Ladang Tebrau iaitu sedang dalam proses mendapatkan kelulusan CCC untuk bangunan baharu sekolah yang telah siap dibina; dan
- (ii) SJK(T) Ladang Highland yang tanahnya masih dalam tindakan pemaju.

Sebagai kesimpulannya, semua isu yang dibangkitkan oleh Ahli Yang Berhormat Segamat sememangnya dalam perhatian dan tindakan KPM. KPM akan terus berusaha meningkatkan fasiliti sekolah bagi memastikan kemenjadian murid memberi impak positif kepada keluarga, masyarakat dan negara. Pada masa yang sama, KPM menghargai pandangan dan kerjasama semua pihak dalam menjayakan agenda pendidikan negara melibatkan kepentingan murid pelbagai kaum di negara ini. Sekian jawapan saya, ribuan terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri Pendidikan. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 21 Mac 2019.

[Kamar Khas ditangguhkan pada pukul 2.44 petang]